

Laura Wernet-Paskel

un señora cu a marca historia



Laura Simona Paskel a nace dia 18 di Februari 1911 den e districto di Santa Cruz. Su mama y tata tabata cunukeronan, y for di trempan Laura a conoce e trabao duro aki. Pero su tata no tabata kier e trabao aki pa su yiu muher. Tur siman e tabata hiba Laura ariba burico for di Santa Cruz te na Playa cerca e soeurnan pa asina e por haya les for di nan. Laura mes tabata gusta esaki hopi! Laura tabata forma parti tambe di e coro di misa di Noord, pasobra e tabata gusta canta tambe!

Na edad di 15 aña Laura a bai Hulanda pa sigui studia, y dia 11 di juni 1931 Laura a ricibi su diploma di "Onderwijzeres". Esey ta un palabra elegante, y e kiermen un maestro di scol.

Aruba tabata tin su prome maestro gradua na Hulanda. Laura a studia varios idioma tambe, cu no ta e hulandes so, sino frances, aleman y ingles. Tambe el a obtene diploma di handwerken, godsdienst y varios otro.

Laura a cuminsa traha como maestro na 1931 mes, hunto cu e soeurnan Dominicanessen na Playa, despues na 1948 na Colegio San Jose, e tempo ey ainda St. Jozef School, despues a bai Maria School na 1952 y na 1953 el a bai Filomena College. Despues di a keda eynan pa un periodo chikito, el a bolbe Maria School y a keda eynan te 1960.

Na 1937 Laura a casa cu Wechi Wernet. Di e matrimonio a nace 7 yiu.

Laura no a keda na e trabao di maestro di scol solamente, sino tambe a dicidi di establece un biblioteca chikito na su cas mes na Santa Cruz. Eynan e tabata ricibi bishita di varios hende cu kier presta bukinan. Tambe tabata duna 'bijles' na muchanan cu tabata tin mester di extra yudansa na scol of cu no tabata bai scol mes!

Durante Segundo Guera Mundial y e 'Dijkoverstroming' Laura tabata prepara cahanan y paketenan cu cuminda den bleki, paña y otro articulonnan necesario cu e tabata colecta aki pa manda Hulanda pa esnan cu tabata den necesidad.

Laura a dicidi di drenta arena politico. Na 1949 el

a participa na e prome eleccion pa Staten di Antiyas Hulandes, unda el a haya e posicion number 5 riba e lista di UNA (Union Nacionalista Arubano).

Mucho e no a keda den politica. El a participa si na un eleccion mas, pero despues di esey a dicidi di bolbe unda mas e ta sinti cu e ta pertenece... den enseñansa.

Pero na 1960 el a retira por completo como cu el a bira malo. Dia 8 di September 1962 Laura Wernet-Paskel a fayece, despues di un enfermedad basta largo.


Awendia ta sigui homenagea Laura pa tur loke el a haci na bida, di un buki, pa un stampia, pa te hasta un scol na su nomber: Colegio Laura Wernet-Paskel, na Kadushi Largo. Un señora ehemplar y pionero den varios aspecto, un señora cu a marca historia. 🙌





Chabalito

Number 1 - Año XII



3,00
(incl. B.B.O.)